

I **Arlechi Bergamàsch**, l'è facc sò de 25 persune, compagnàt de la figùra de L'Arlechi, maschera de Bèrghem, do la compagna la s'è ispirada per das ü nòm.

## I sò spetàcoi.

Ol sò repertòre l'è facc de bàì e cansù popolàr ch'i fà part de la tradissiù bergamàsca, lassada 'ndrè di artisti del tēp passàt. Tra òna cantada e ü bal i compèss l'esibisiù, legènde, poésie e spigassiù de chèl che l'vé proponìt a la zét, in manéra che tót a l'deènte insèma al diertmènt, ü momènt de cùltùra.

Quando invéce i fà i sfilade, i pórtà dré per fàì conòss, i strömènc che s'vüsàa in campagna e la müsica di balade, a l'è amò chèla che s'fàa sò l'éra òna ólta.

I esibissiù di Arlechi Bergamàsch, i è nasside dóma per la passiiù de tègn in véta tót chèl che s'pòl del nòst bèl passàt, co l'Amùr ch'i m'à lassàt indré i nòsc vècc, che con póch i se diertia e i tegnia 'nsèma grancc e picinì coi veri Valùr ch'i cònta 'n de la éta.

## Come i è vesticc.

I còstòm di dòne i è come chèi che s'vüsàa in del vossènto in Val Seriana, specialmènt in del País de Par. La stòfa l'è de cutù con d'òna fantaséa de culùr diferènc. Ü pedàgn largh, òna camisèta bianca ricamada col péss, ü gilé ligàt di bande con di nàster culuràcc e ü scossalì l'è chèl ch'i mèt sò quando i se esebéss in di so spetàcoi. In di cheèi, i gh'à sèmpèr di fiùr de cap e adóma in di ocasiù speciài come i funsiù religiuse, sòl có i mèt sò òna spécie de scöfièta che la se ciàma "panèt". Adóma d'invèrno sura i spàle i se mèt ü sciàl culuràt. Söi pé i pórtà di sàcoi de lègn e sòl bràss i gh'à ü caàgnöl de pàia.

La divisa di òmegn invéce, l'è chèla di pastùr bergamàschi, coi culùr ch'i riciàma la maschéra del Giopi. Ol còstòm a l'compènd: braghe a la zuàva, gilé e giàca facc co la stòfa de pan, camisa bianca e fassöl culuràt al còl, calsetù a righe bianche e rósse, capèl sòl có. Ü bastù, òn'ombrèla culurada, insèma a òna mantèla, c iamada "tabàr", che s'la dóvra d'invèrno la compléta l'opera.

Töcc i còstòm i è pò adatàcc in di particolar, in manéra de rènd la sòmeànsa a la maschéra bergamàsca de l'Arlechi che l'è ol modèl che lur i vòl unurà.



Chèsta Associassiù folcloristica, la fà part del **Dücàt de Piassa Pontida**, sodalésse che del 1924 a l'fà conòss e l'tègn in véta la cùltùra e la tradissiù bergamàsca. President l'è in arte ol Düca Liber Prim che 'n de éta a l'fà de nòm Bruno Agazzi.

**Carmen Fumagalli Guariglia**



Chèi ch'i vòlèss contatà sto grupp, che l'è disponibel a 'nda anche 'n di scòle per fàga conòss ach ai scècc e ai züegn tót chèl ch'i gha de sai di nòste raìs bergamàsche, l'è assé ch'i ciàme ol **Rugéro Nani** al n° **3388506622** opòr al **0350600974**.

Per chi che 'nvéce l'è piö moderno i gha de fa: **info@arlecchinobergamasco.it** opòr **www.arlecchinobergamasco.it**